

REGIONAL NEWS BULLETIN

HEADLINES (MORNING)

1. Aizawla Assam Rifles-in an ram luah an chhuahsan hunah an ram chu khauh takin an humhalh dawn tih Chief Minister Pu Lalduhoma’n a sawi.
2. Chief Secretary, Khilli Ram Meena’n Champhai District-a raltlante awmkhawmna hmun pahnihleh Indo-Myanmar ramri te a tlawh.
3. PWD Minister Pu Vanlalhlana’n nimin khan Sihhmuia Tlawng lei rem khawm tawh, dawh kai tur enchhinna, ‘trial launch’ neih tan chu a hmun ah a enpui.



CM

Aizawla Assam Rifles-in an ram luah an chhuahsan hunah an ram chu khauh takin an humhalh dawn tih Chief Minister Pu Lalduhoma’n a sawi.

Centre for Environment & Social Justice (CESJ) buatsaih, Assam Rifle ram chungga thing chhiarpui leh zirchianna lehkhabu a tlangzarhnaah he thu hi sawiin Chief Minister chuan Assam Rifles sawn chhuah tur chungchangah hma lak mek a ni a, ram tehin joint survey an nei mek tih a sawi.

Chief Minister chuan khawvelin hmasawmna ngelnghet leh rochun theih a ngai pawimawh tawh a, hmasawmna hna thawh chu khuarei daih leh leilung tichhe lo thei ang ber an ni zel tawh tih sawiin theihtawp chhuah a pawimawh, a ti a, hmasawmna hna thenkhat chu ram leilung tichhe zawnga kalpui ngai a awm thin tih sawiin ram hmasawn nan inrawnkhawm a pawimawh tih a sawi bawk.

Chief Minister-in a tlangzarh lehkhabu a lan dan chuan Assam Rifles ram Hectare16.9 a zauah hian thing chi hrang hrang 480 a awm a, species hrang 80, family 31 leh genera 59 an awm a. International Union for Conservation of Nature te tehfung atanga tehin riral hlauhawm tak venhim ngai bik thing chi 4 a awm a, an riral hlauhthawnawm 1 leh dinhmun ngaihtuahawm 5 an awm bawk. An zinga 71 hi ramhmul damdawia hman theih leh ei theih chite an ni bawk.

CESJ Working Chairman Pi Vanramchhuangi pawhin thu sawiin, CESJ ngaihndanah ramngaw chu humhalh hmasak phawt ni se an tih thu a sawi a, Hmasawmna chuan ram leilung leh ramngaw tichhe lo thei ang berin, a humhimna dan zawm tlat chungin thawk se an duh tih a sawi bawk.

(DIPR)



CS

Chief Secretary, Khilli Ram Meena chuan nimin khan Champhai District-a raltlante awmkhawmna hmun pahnih - Champhai Zote ITI Camp leh Bethel Camp, Zokhawthar a tlawh a. Indo-Myanmar ramri a tlawh bawk.

Pu Khilli Ram Meena hi Champhai Bawrsap Pu VL Remliana, Addl SP Pu PC Lalţanpuia, sawrkar official dang te leh Sub Hqrs YMA hruaitu ten an ţawiawm a. Sawrkar hotute leh tlawmngai pawl hruaitute hian Chief Secretary hnenah hian raltlan enkawlna kawnga an hmalakna hrang hrang leh harsatna an tawh te an hrilhfiyah a. Champhai Zote ITI Camp-a awm mek te chu Sub Headquarters YMA ruahmanna angin Champhai Zion Vengah sawn tum mek an nih thu an lo hrilh bawk a ni.

Chief Secretary hian raltlan zinga an hruaitute pawh a kawm a. An harsatna leh an dinhmun te a zawtfiyah a ni.

Champhai Zote ITI Camp-ah hian tun dinhmunah raltlan mi 317 - puitling mipa 169, hmeichhia 62 leh naupang 86 an awm mek a. Bethel Camp, Zokhawtharah hian mi 399 - puitling mipa 110, hmeichhia 177 leh naupang 112 an awm mek a ni.

Nimin vek khan Chief Secretary kaihhruiin Champhai District-a sawrkar pisa hotulu te an ţukhawm dawn a. Ramri chungchang, Solid Waste Management leh Agriculture Department hmalakna te an sawiho ang.

(DIPR)



TOURISM MINISTER

PWD Minister Pu Vanlalhlana'n nimin khan Sihhmuia Tlawng lei rem khawm tawh, dawh kai tur enchhinna, 'trial launch' neih ţan chu a hmun ah a enpui a.

Minister chuan Mizoram kawng pawimawh tak thlunzawmna tur Tlawng lei remkhawm mek chu hlawhtling tak a dawh fel a nih thuai theih nan ţan a nih thu a sawi a. Khawvel thiamna changkang tak hmang a lei remkhawm leh a dawh hna hi kalpui a nih avangin hun engemaw chen kawng khar a ngai tih sawiin, inkalpawhna tha leh rintlak zawk neih theih nan kawngpui khar rih a ngai a, he kawng zawhtu mipuite chu hun rei lo te chhung lo la dawh hram hram turin a ngen a. Ruahman ang a hna kalpui a nih chuan kar leh chhung hian lei hi dawh kai hman beisei a nih thu sawiin, lei dawh kai atanga ni 120 chhungin lirthei engchi pawhin a zawh theih tur a hawn hman tum a ni a ti.

Chief Engineer Zoramliana tarlan danin Tlawng lei hi ton 450 vel a rit niin metre 90 a thui a ni a, Lei hi hrui hmang a khai phei a ni dawn a, minute khat ah centimetre 30 zelin pawh phei a ni ang a, darkar 6 atanga darkar 8 chhung a pawh kai hman beisei a nih thu a sawi.

Tlawng lei hi 'Network Inclined Arch Bridge' a ni a, Poddar Infratech Pvt. Ltd., Delhi ten hna hi March 27, 2021 atang khan an thawk tan a. Project kalpuina atan hian MoRTH atangin Rs. 36.99 Crore ruahman a ni. Lei thar hlan fel a nih hun ah kawng hi lei hlui lam motor zawh theih a hawn theih beisei a nih thu thawktute chuan an sawi.

(DIPR)



LUNGLEI

Lungleia District Hub for Empowerment of Women, District Programme Officer Office, Women & Child Development Department bul tumin YMA Sub-Headquarters Conference Hall, Lungleiah hmeichhiate chungah hleilenna thlang ţhin tibo tura ni 16 chhunga beihpui thlak chu nimin khan khar a ni.

A kharna hun hi Lunglei Sub-Divisional Officer (Sadar) Pi TT Beikhaizi chuan a hmanpui a, Pi TT Beikhaizi chuan hmeichhe chungah hleilenna tihah hian kut thlak ringawt ni lovin, an khawsak leh an nun tinuam lo thei khawpa rilru naa siam te a tel thei vek tih sawiin, chu chuan inkiltawihna leh mahni nunna lak duhna hial te a thlen theih avangin fimkhur a ţul tih a sawi a. Hmeichhiate'n mahni dikna chanvo hriat thar ţul a tih thu te, hleilenna a lo thlenin dan anga rorel a nih theih nan thuneitute hnena thlen vat ţhin a pawimawh thu te, chhungkua leh kohhranah hmeichhiate venhimna lam inzirtir uar zel a ţul thu leh hmeichhiate pawhin mipate zah thiam zir a ngaih thu te a sawi a ni.

He hun hi Lunglei ICDS Project-a Child Development Project Officer Pi R. Lalhmingliani chuan a kaihruai a. Elimination of Gender Based Violence campaign hman a nih chhan leh hemi puala activity hrang hrang buatsaih dan a sawi a ni.

He hun hmanah hian DPO, DCPU, OSC leh Shakti Sadan staff-te leh anganwadi worker-te an tel a ni.

(DIPR)



ASTALAKSHMI MAHOTSAV

Ramchhung hmarchhak state hrang hrangte puala DoNER Ministry-in intawhkhawmna lian a buatsaih Ashtalakshmi Mahotsav ni 3 awh tur chu New Delhi-ah neih mek a ni a, vawiin thleng a awn ang.

Mizoram sorkar aiawhin Minister of State Pu Lalnghinglova Hma a tel a, Sports Minister Pu Lalnghinglova Hmar chuan he hunah hian Mizoram leh hmar chhak state-te hmasawmna tur hrang hrang a sawi a, sports chungchang bikah Khelo India Scheme kaltlanga sum hmuh thin chuan hmar chhak state mipui, sports ngaina takte mamawh a phuhru zo meuh lo, a ti a. Prime Minister Narendra Modi kaihhruaina hnuaiah India-in Olympic 2036 thlen a dil thu leh inbuatsaih a tul thu a sawi a, hmar chhak bialah sports talent a awm a, mumal taka investment kalpui a nih phawt chuan Olympics 2036-a India hlawhtlinna kawng sialtu pawimawh tak a ni thei a ti. North East-a sports hmasawn zel nan Ministry of DoNER in hmar chhak state-te special status dil sak thei se, tiin rawtna a siam bawk.

He intawhkhawm hun Hawmna nimina neihah DoNER Minister Jyotiraditya Scindia bakah hmar chhak state-a Chief Minister-te an tel a, he hunah hian hmarchhak state-te puala hun hman niin state pariat aʔangin an thlai leh thei thar chhuah hrang hrang leh kutthemthiamna hmanga an thil siamte pho chhuah a nih bakah mithiamte inrawnkhawmna hun buatsaih a ni a, state hrang hrangte culture leh zirang hrang hrang entir a ni. Hei bakah hian zai, lam, lemchan, fashion show-te awmin sports lam sawihona hun leh investment lama inrawn khawmna hun buatsaih a ni bawk.

India hmar chhaka MP hrang hrangte sawm an nih angin Mizoram Lok Sabha MP Pu Richard Vanlalmangaiha pawh hawmna inkhawmah hian a tel bakah India hmarchhak atanga Sport lama mi hmingthate sawm an nih angin Pu Jeje Lalpekhluo MLA pawh he hunah hian a tela, Mizoram aʔangin zai thiam leh lam thiamte bakah kuthathawktu thei, thlai leh pangpar chingcute, kut themthiamna lama eizawngte leh sorkar mi pawimawh eng emaw zat an tel bawk a ni.

(DIPR)



PRIME MINISTER

Prime Minister Narendra Modi chuan nimin khan Ukraine indo laia India ram mipuite hruaichhuahna tura BAPS hmalakna chu a fakawm a tih thu a sawi. BAPS-in mipui puihna hna nasa tak a thawh avangin khawvel pumah India thiltihtheihna leh thuneihna a tichak a ni, a ti. BAPS Karyakar Suvarna Mahotsav -a thu a sawinaah PM Modi chuan khawvel pum huapa ram nunphung leh thlarau lam ro hlute thehdarh kawngah BAPS-in a thawhhlawkzia a sawi a. India ram a kan ngaihhlut seva principle chu sawiin, mi dang te tana inpe in , theihtawp chhuah turin tlawmngai pawlte chu a chah a ni.

(News On Air)

